

Kulikuli ye lau Hebelu tamowaidiyao udiyedi

Buka ta hededehemasalahana

Teina leta ta ye lau Hebelu tamowaidi** udiyedi, siya nuwana Italiya unai taumiya**. Leta ta kaniyona ede Dius tamowaidiyao Yesu tausunumaena bena tabu se uyo'uyo yodi taba'ohu beyabeyana unai na laugagayo yo kabikabi Yaubada ye mosedi Mose unai na se laoma Dius tamowaidiyao udiyedi meta tabu se miyawatani'uyoidi. Huyana leta ta se hai meta ekalesiya hekamkamna laki-lakina se hekalo ede hekadiyo se hetubu se nuwabasabasa na Yesu Keliso bena se kitagabaei (Hebelu 6:11-12, 12:1-3).

Leta taukulina Dius tamowaidi siya Yesu tausunumaena wa ye henuwaisinidi meta Keliso iya ede Yaubada natuna. Yesu ye saekalili, na kabo anelu, Mose yo peloweta hekadiyo (Hebelu 1:5—4:14). Yo iya yoda taukaitalasam saesaena, na yona kabihemauli hesabada wa ye saekalili na kabo Aloni yo taukaitalasam maudoidi yodi kabikabi wa (Hebelu 9:23—10:18). Yesu iya talam hauhauna tauhaiyamana. Na talam ne ye saekalili na kabo talam bagubagunana (Hebelu 4:14—5:10) yo iya yoda tauhedehedede Yaubada matanawai doha Dius yodi taukaitalasam saesaedi (7:1—8:13). Leta ta hinage ye hekatada meta sunuma iya ginauli saesaekalilina (Hebelu 11:1—12:29).

** :: Hebelu tamowaidi: Hebelu meta Dius tamowaidiyao hesadi hesau.

** :: Italiya unai taumiya: Teina tausonoga yodi kaimasi, matawuwuna Italiya unai taulaoma yodi lautoki ye kulilae leta ta tauhaina ne udiyedi (Hebelu 13:24)

Leta ta taukulina meta hesana nige ye kulihemasalaha, unai nige kabina ta kata iya kaiteya. Bagubagunana tausibasiba gwaudi yodi nuwatu bena Paulo iya leta ta taukulina ede, matawuwuna taukulikuli wa Timoti wasana ye hededegebabei (Hebelu 13:23). Iyamo mulinawai tausibasiba hekadiyo yodi nuwatu udoi. Na ye masalahakalili meta leta taukulina wa Dius tamowaidiyao yodi taba'ohu kabikabidi kabidi ye katakalili (Hebelu 8:3-5, 9:1—10:18), unai iya nuwana Dius tamowaina hesau. Huyana leta ta ye kuli meta Yelusalema unai Numa Tabuna wa sola ma totolona. Loma tamowaidi Numa Tabuna ne se heyababa bolimaina meta ta hedede ta wane 70 AD** unai.

Nuwatu lakilakidi

- Keliso meta Yaubada yona tauhedehedede na iya ede Yaubada natuna (*Hebelu 1:1-3*)
- Keliso ye saekalili na kabo anelu (*Hebelu 1:4—2:18*)
- Keliso ye saekalili na kabo Mose (*Hebelu 3:1—4:13*)
- Keliso ye saekalili na kabo Aloni yo taukaitalam maudoidi (*Hebelu 4:14—7:28*)
- Keliso yona kaitalam ye saekalili na kabo kaitalam hekadiyo (*Hebelu 8:1—10:39*)
- Hededehebaya ye lau Keliso tausunumaena udiyedi (*Hebelu 11:1—12:29*)
- Hededehebaya gehegehena (*Hebelu 13:1-25*)

Yaubada natuna Yesu iya ye saekalili

¹ Huya bagubagunana unai Yaubada hedehedede ye moseidi peloweta udiyedi huya udoi'udoi udiyedi yo laulau udoi'udoi udiyedi, na kabo se hededegebabei kada mumugao udiyedi. ² Na teina huya mulimulitana ta unai

** :: 70 AD kaniyona ede Yesu yona huyalabasi na bolimai 70 mulidiwai.

Yaubada yona hedehedede ye mosei natuna unai, na iya ye hededelaoma kalidawai. Natuna iya ede Yaubada maiyana tanoubu maudoina ta se hetubudi wa,** yo Yaubada iya ye kaisunuwai kabo ginauli maudoidi ye mosehekawadi unai. ³ Natuna Tamana yona namanamali yo hinage kana kao dudulaina ye hemasalahadi kalidawai yo ginauli maudoidi ye hebayaodi yona hedehedede gigibwalina unai, to bena se miyahai. Ba'aya kabahe'a'ana ye ginauli, mulinawai kabo ye tulidobi Wasawasa Saesaena nimatutunaena galewa unai.

Yesu ye saekalili na kabo anelu

⁴ Teina ye hemasalaha meta Natuna ye saekalili na kabo anelu, yo hinage gonogonowana doha iya hesana ye saekalili na kabo anelu hesadiyao.

⁵ Matawuwuna Yaubada nige ye hededelau anelu hesau unai ye wane,

“Kowa yau natugu,
mayadai ta unai ya hemala tamam.” (Same 2:7)
o hinage,

“Yau kabo tamana na iya kabo natugu.” (2 Samuwela 7:14)

⁶ Yo huyana Yaubada natuna taubaguna** ye hetamaliyama tanoubu ta unai iya hedehededena ye hedehededei ye wane,

** 1:2: Yowane 1:1-3 ** 1:6: Yaubada natuna taubaguna: Kalina Giliki unai taubaguna kaniyona ede, ye saekalili, o, hekahekasina. Gonogonowana doha, Dius tamowaidiyao taubaguna se kita meta iya ye saekalili na kabo yona golowao.

“Yaubada yona anelu maudoidi taba se kaihelahui.”

*(Dutelonomi 32:43)***

⁷ Yona anelu hedehedededi ye wane,

“Yona anelu ye ginaulidi *yodi sagena* siya yaumai** ,
yo yona heyayai tauhaidi *yodi gigibwali* siya kaiwa
pulupululuna.” *(Same 104:4)*

⁸ Na Yaubada ye hededelau natuna unai ye wane,

“Yaubada, yom kabatuli kabo ye miya nige kana siga,
yo yom basileiya ne kabo laulaududulai unai ku
tanuwagai.

⁹ Kowa laulau dudulaina ku henuwa na laulau
yabayababadi ku subudi.

Unai Yaubada, iya yom Yaubada, ye heyausigo
gwauyala yausina unai.

Teina unai ye kitahesaego kam kahao maudoidi
luwadiwai.” *(Same 45:6-7)*

¹⁰ Hinage ye hededelau natuna unai ye wane,

“Guiyau, huya bagubagunana unai kowa tanoubu
wuwuna ku tole
yo hinage galewa meta nimam ginaulina. *(Same 8:6,
Sakaliya 12:1)*

¹¹ Siya kabo se tauwadam, na kowa ku miyahai.

Kabo se beyabeya doha kaleko beyabeyana.

¹² Kabo ku nokudi doha kaleko,

** **1:6:** Anelu maudoidi taba se kaihelahui: Buka ta taukulina nimaku-
likuli pepwadi beyabeyadi hekadi yodi kulikuli ye katai, siya ede Dios
yodi tausonoga bodana hesana Masora (600-1000 AD) se kuliyawasidi na se
laoma kalidaena. Na Buka Tabuna kalina Dimdimyena se kulidi, doha *New
International Version (NIV)* o *New English Translation (NET)*, Dutelonomi 32:43
unai siya nimakulikuli pepwadi beyabeyakalilidi hekadi se kuliwatanidi na
Masora yodi kulikuli wa FOOTNOTE mo unai se katai. ** **1:7:** Yaumai
meta kalina Giliki unai kaniyona labui, yaumai yo yaluwa.

yo doha luwuluwu beyabeyana kabo ku haigabaedi
na hauhaudi ku toledi.
Na kam kao gonogonowana mo

yo yom bolimai taba nige kadi siga.” (*Same 102:25-27*)
13 Yo Yaubada nige anelu hesau unai ye hededelau ye
wane,

“Nimatuuuugu ta unai ku tuli,
kana siga kam waiunu ya toledi kaem kabatoledi.”
(*Same 110:1*)

14 Na anelu meta siya yaluyaluwa** yo heyayai tauhaina
mo, na Yaubada ye hetahetamalidi bena mauli tauhaidi se
saguidi.

2

Wasa namwanamwana ta bena ta lapunamwanamwaei

1 Unai teina wasa namwanamwana Yesu ye leyama
ta, taba ye namwa mo bena ta lapunamwanamwaei,
mada ta sigisigisuwala. 2 Huya bagubagunana Yaubada
yona laugagayo anelu se mosei Mose unai Sinai koy-
ana unai wa meta ma gigibwalina. Na ena tamowai
hesau laugagayo wa ye utusi yo nige ye kawakabiyeyi
kabo hekamkamna dudulaina ye lobai. 3 Unai, ena
Yesu yona kabihemaui saesaena ta ta kitahegagili, taba
nige Yaubada yona hekamkamna lakilakina ta kaihalei!
Teina kabihemaui ta bagubaguna unai Guiyau ye hed-
edegabaei na kaiteyadi se lapui meta se hemamohoyeyi
kalidawai, 4 yo hinage Yaubada ye hemamohoyeyi hek-
ihokinoi yo laulau gigigigibwalidi udoi'udoi udiyedi, yo
kabahemamohoyena hesau ede Yaluwa Tabuna ye mosei
tamowai udiyedi yona hineli unai.

Yesu ye hemala doha kita

** 1:14: Yaluyaluwa hedehedena kalina Giliki unai meta kaniyona labui,
yaumai yo yaluwa.

⁵ Tanoubu hesau matada ne unai ta hetahetala ta Yaubada taba nige ye mosei anelu se tanuwagai. ⁶ Buka Tabuna tehana hesau unai tamowai hesau ye hededelau Yaubada unai ye wane,

“Tamowai nige ye sae, na iyamo ku nuwatui,
yo tamowai natuna ku kitahetete.

⁷ Huyakubwakubwa unai iya ku tole anelu gunidiwai,
na kabo hedebasae yo hekasisi unai ku hepasa.

⁸ Ginauli maudoidi ku mosediko iya ye tanuwagaidi.”
(*Same 8:4-6*)

Na teina hedehehede ta “ginauli maudoidi” kaniyona ede “nige ginauli hesau ye kabihebeku”. Na sola nige ta kita meta tamowai ginauli maudoidi ye tanuwagaidi.

⁹ Na saha ta kita ede Yesu. Huyakubwakubwawai Yaubada iya ye toledobiyei anelu gunidiwai, na kabo hedebasae yo hekasisi udiyedi ye hepasa, matawuwuna ede Yesu ye boita kita hesabada. Mamohoi, Yaubada yona kabinamwa unai Yesu ye boita tanoubu maudoina hesabadi.

¹⁰ Ginauli maudoidi Yaubada ye hetubudi na yona kitahetete unai se miya na ye henuwa taba natunao se bado ye haidi se laoma yona didiga ne unai. Unai ye namwa mo taba Yaubada hesaguhai tauhetubuna wa ye laei kamkamna ye hekalo na teina unai kabo kana kao saesaena ye hai. ¹¹ Ede Yesu iya tamowai tautolehesuwaladi na siya Yaubada yona, yo kaiteyadi ye tolehesuwaladi ne meta siya maidadi tamadi kesega. Temeta unai Yesu nige ye mwadine bena ye kataidi kana kahao yo lounao. ¹² Doha ye hededelau Yaubada unai ye wane,

“Kabo kam kao namwanamwana ya hedehehemasalaha kagu kahao yo louguwao udiyedi.

Yo yogu wana udiyedi kabo ya hedebasae go yom tamowai bodadi luwanawai.” (*Same 22:22*)

¹³ Iya hinage ye wane,

“Yogu sunuma kabo ya tole iya unai.” (Aisaiya 8:17)
 Na nuwanuwatu gonogonowana ta unai ye wane,
 “Yau ede teina, na Yaubada natunao ye ledima wa
 maiyaguwao.” (Aisaiya 8:18)

¹⁴ Yaubada natunao ne buluma yo kwasina unai ye ginaulidi, unai Yesu hinage ye hemala buluma yo kwasina gonogonowana doha siya, meta kabo gonowana yona boita unai boita tanuwagana, iya ede diyabolo, yona g-gibwali ye koigwaligwali, ¹⁵ yo tamowai ye yailihaidi. Siya ede boita taumatausiyeina yo yodi mauliyena meta siya Satani yona heyayai tauhaidi. ¹⁶ Ye laoma nige bena anelu ye saguidi, na bena Abelahama kana isimulitao ye saguidi. ¹⁷ Teina debanaena ede Yesu ye hemala tamowai doha kita, bena iya taukaitalasang saesaena namwanamwana. Unai iya ye katekamkamnaeda yoda basabasa udiyedi, yo hinage Yaubada yona ye paisowanamwanamwa, na kaitalasang ye ginauli tamowai yodi yababa kabanuwatugabaedi. ¹⁸ Iya laukita ye hekalo na unai ye kamkamna, unai iya gonowana ye saguida huyana laukita ta hekalo.

3

Yesu ye saekalili na kabo Mose

¹ Kagu kahao yo louguwao, Yaubada yona tamowai, galewa yogana taulapuina doha yau, ya henuwa bena nuwamiu se lau Yesu unai, iya ede ta hedeheedei meta iya Yaubada yona hetahetamali tamowaina yo yoda taukaitalasang saesaena. ² Iya nuwana ye tolekesegai taukaisunuwaina unai na yona paisowa ye ginauli gonogonowana doha Mose hinage yona paisowa ye ginaulike-segai Yaubada yona numa unai.** ³ Na Yesu hede-basae saesaena ye hai na kabo Mose, doha hinage numa

** **3:2:** Numa ne, iya ede Isalaela tamowaidi heyaheyasonidi, na Mose iya kadi boda hesau.

namwanamwana tauginaulina hedebasae lakilakina ye hai na kabo numa ne. ⁴ Numa kesega kesega tauginaulidi udoi'udo, na Yaubada ye bom ginauli maudoidi tauginaulidi. ⁵ Mose nuwana ye tolekesegai Yaubada yona numa paisowana unai, na iya meta heyayai tauhaina mo. Yona paisowa wa meta saha kabo Yaubada huya matadawai ye hemalahadi ne tautaudi. ⁶ Na Keliso nuwana ye tolekesegai Yaubada unai, na iya Yaubada natuna yo yona numa tauginaulidi. Numa ne iya ede kita, ena taba yoda nuwabayo yo yoda kabagwayala ta kabihakinidi. Yoda kabagwayala ede Yaubada yona hedehesunuma kalidawai wa yona hemamohiyedi matada ne unai.

Hedehede bayabayaona ye lau taukawayagala udiyedi

⁷ Unai Yaluwa Tabuna yona hedehede bena kwa lapui, doha ye wane,

“Teina mayadai ta unai, ena kalinana kwa lapui,

⁸ tabu nuwamiu kwa hekwalolodi iya unai,

doha Isalaela tamowaidiyao se tolodagedaelai huyana Yaubada se laukita balabala unai.

⁹ Temenai kami mumugao yogu kabinamwa kalidiwai bolimai 40 luwadiwai se kitadi na sola *yodi laulau ta udiyedi* se laulautonogigau.

¹⁰ Unai tenem isi ne ya koipiliyeidi na ya wane, ‘Siya huya badobado nuwadi se toletolehesuwaladi kaliguwai. Saha ya hedede bena se ginaulidi wa se kawaya-galaei.’

¹¹ Unai ede yogu kouyalayala unai ya heddekaigwala,

‘Taba nige se lusola yogu kabakaiyawasi magaina **
unai.’ ” *(Same 95:7-11)*

¹² Bena kwa kitanamwanamwa, kagu kahao yo louguwao. Kwa kitahetete'uyoigomiu tabu nuwamiu se yababa yo se labulabui, yo tabu Yaubada Maumaulina kwa nuwagabaei. ¹³ Komiu ma kami kahao bena kwa haihedehededehebayaoy'uyoigomiu mayadai kesega kesega udiyedi. Na teina mayadai kesega kesega Yaubada ye katai “teina mayadai ta”. Unai kabo taba nige yababa ye lupoigomiu na nuwamiu se kwailolo Yaubada unai.

¹⁴ Ena nuwada ta tolekesegai Yaubada unai ye lau ee yoda huya kana siga yo ta tolobayao yoda sunuma unai doha huya bagubagunana yoda nuwabui mayadaina wa, kabo ta hemala Keliso kana kahao yo lounao mamohoidiyao.

¹⁵ Na tabu teina hedehedede bayabayaona ta nuwamiu se luluhidi:

“Teina mayadai ta unai ena kalinana kwa lapui,
tabu nuwamiu kwa hekwailolodi iya unai
doha Isalaela tamowaidiyao huyana se
tolodagedagelaie.” *(Same 95:7-8)*

¹⁶ Na tamowai Yaubada kalinana se lapui na iyamo se kawayagalaie wa, siya kaiteyadi? Siya ede Aikupito unai Mose ye woyahepesadi wa. ¹⁷ Na bolimai 40 luwadi wa unai Yaubada tamowai ye kouyalayalaedi wa, siya kaiteya? Tamowaidiyao ne meta se yababa na balabala unai se boita. ¹⁸ Yo siya kaiteyadi Yaubada ye hetahetaladi yo ye hededekaigwala meta taba nige yona kabakaiyawasi magaina unai se lusola? Siya ede taukawayagalaena wa. ¹⁹ Unai ta nuwatulobai meta siya taba nige se

** **3:11:** Yogu kabakaiyawasi magaina: Yaubada yona huyahedede wa unai, teina hedehedede ta kaniyona ede Kanana. Hebelu 4:3 yo 4:6 udiyedi buka ta taukulina wa kabo kabakaiyawasi magaina ye heyaheyasoniyei galewa unai.

lagelau Yaubada yona kabakaiyawasi magaina wa unai, matawuwuna nige se kawamamohoi.

4

Yaubada natunao yodi kabakaiyawasi hededehesunumana

¹ Yaubada yona kabakaiyawasi magaina lusolana hededehesunumana sola ye totolo, unai kita bena ta kitanamwanamwa, madai hesau luwadaena Yaubada ye kitalobai taba nige gonowana ye lusola. ² Na wasa namwanamwana meta Yaubada kabakaiyawasi magaina ye kabinonohaiyako, kita hinage ta lapuiyako gonogonowana doha siya. Na wasa se lapui wa meta nige ye saguidi, matawuwuna saha Yaubada ye hedede kalidiwai wa nige se kawamamohoiyei. ³ Na kita taukawamamohoi gonowana ta lusola yona kabakaiyawasi magaina unai. Na *kaiteyadi nige se kawamamohoi kalidiwai* Yaubada ye wane, “Yogu kouyalayala unai ya hededekaigwala,

‘Taba nige se lusola yogu kabakaiyawasi magaina unai.’ ” *(Same 95:11)*

Iyamo Yaubada yona kabakaiyawasi magaina ye nonohaiyako huyana tanoubu yona huyahetubuna wa unai. ⁴ Doha kulikuli tabuna teha hesau unai mayadai hehaligigi-labuina ne hedehedena ye hedede ye wane, “Yaubada yona paisowa maudoidi udiyedi ye kaiyawasi mayadai hehaligigi-labuina unai.” *(Genese 2:2)*

⁵ Na kulikuli hesauna wa unai ye wane,

“Taba nige se lusola yogu kabakaiyawasi magaina unai.”

⁶ Tamowai bagubagunadi wasa se lapui wa nige se lusola yodi kawayagala debanawai, na kabakaiyawasi magaina wa sola ye totolo tamowai hekadi hesabadi bena se lusola.

⁷ Tenem unai Yaubada huya hesau ye tole kabakaiyawasi magaina lusolana hesabana na hesana ye katai ede, “Teina

mayadai ta”, huyana yona hedehedede ye mosei Dawida ** unai. Na Dawida ye hedede ye wane, doha ya kuliyako wa: “Teina mayadai ta unai, ena kalinana kwa lapui, tabu nuwamiu kwa hekwaitolodi iya unai.”

⁸ Ena taba Yosua Isalaela tamowaidi wa ye woyalaediko kabakaiyawasi magaina ne unai, meta Yaubada huya mulinawai taba nige mayadai hesau ye kaisunuwai'uyoi.

⁹ Unai kaiyawasi mayadaina wa sola ye totolo Yaubada yona tamowai yodi. ¹⁰ Na ena tamowai hesau ye lage-lau Yaubada yona kabakaiyawasi unai, meta kabo ye kaiyawasi yona paisowa maudoidi udiyedi, doha ede Yaubada yona paisowa maudoidi mulidiyena hinage ye kaiyawasi. ¹¹ Unai bena ta kaipatebayao na ta lusola kabakaiyawasi magaina ne unai, na tabu Yaubada ta kawayagalaei doha Isalaela tamowaidiyao wa. Ena yoda laulau doha siya meta kabo ta beku na nige ta lusola.

¹² Matawuwuna Yaubada yona hedehedede meta mau-maulina yo gigigigibwalina yo ye matakalili na kabo kelepatamatatehalabulabui. Nuwada ye bolilapaidi ye luwu ye lau yoda nuwanuwatu yo yoda hineli mamohoidiyao udiyedi ye lage na ye hinelidi yo ye kitasip-waidi. ¹³ Yaubada matanawai ginauli maudoidi nige hesau wadawadamna, na se masalahakalili matanawai. Laulau sahasahadi ta ginaulidi meta bena ta hededeheemasalahadi iya kalinawai.

Yesu yoda taukaitalasam saesaena

¹⁴ Yoda sunuma ta hedehededeheemasalaha ta unai bena ta tolobayao, matawuwuna yoda taukaitalasam saesaena ye saeko galewa. Iya ede Yesu, Yaubada natuna. ¹⁵ Yoda taukaitalasam saesaena ta yoda basabasa maudoidi kabidi

** **4:7:** Dawida: Isalaela tamowaidi yodi kawayagala mulidiwai bolimai gwaudi se lauko na kabo Dawida wasawasa ye tubu.

ye katakalili, matawuwuna laukita maudoidi ta hekalodi ta meta iya hinage ye hekalodi. Na iyamo nige ye ba'aya. ¹⁶ Unai bena ta laoma Yaubada yona telona ta hana-hanawui ma nuwabayaoda, kabo yona katekamkamna yo kabinamwa ta lobaidi na yoda huyayababa unai kabo ye saguida.

5

¹ Dius tamowaidi yodi taukaitalasam saesaena tamowai luwadiwai Yaubada ye hetolo na yona paisowa meta tamowai yodi tautolo Yaubada matanawai na kainauya yo kaitalasam ye mosei tamowai yodi yababa hesabadi. ² Iya gonowana ye taubigakalili tausupusupu yo taugege tamowaidiyao kalidiwai, matawuwuna ede iya taubasabasa hesau. ³ Teina debanaena ede kaitalasam ye ginaulidi iya ye bom yona yababa hesabadi yo kabo hinage tamowai maudoidi yodi yababa hesabadi.

⁴ Nige tamowai hesau teina paisowa hekahekasina ta yona nuwahineliwai ye hai, na Yaubada yona yoga mo unai, doha Aloni. ⁵ Unai Keliso hinage nige ye bom ye hesae'uyoi na ye hemala taukaitalasam saesaena, na Yaubada iya ye toleisini na ye wane,
“Kowa yau natugu;

mayadai ta unai ya hemala tamam.” *(Same 2:7)*

⁶ Yo kulikuli tehana hesau unai ye wane,
“Kowa taukaitalasam tamowaina ye lau ee huya nige sigana doha Melekisedeka.” ^{**} *(Same 110:4)*

⁷ Huyana Yesu tanoubu ta unai ye miyamiya meta tapwalolo yo kaibwada ye moseidi Yaubada unai ma kalina lakilakina yo ma matasuluna, na Yaubada gonowana boita unai ye hemaui. Na Yaubada Yesu kalinana ye lapui

** 5:6: Melekisedeka wasana ede Genese 14:18-20 unai ku hasili.

matawuwuna Yesu iya ye hekasisiyei yo yona gigibwali unai ye miya. ⁸ Iya Yaubada natuna mamohoina, na iyamo kamkamna unai nuwamasalaha ye hai idohagi na ye kawakabi. ⁹ Na huyana nuwanuwatu maudoina ye hai-hegehe ede ye hemala iya taukawakabiyeina tamowaidi maudoidi yodi kabihemauli nige sigana yona kabalaoma. ¹⁰ Na Yaubada iya ye kaisunuwai taukaitalasam saesaena doha Melekisedeka.

Hedede bayabayaona ye lau Yaubada tautolehesuwalana udiyedi

¹¹ Teina nuwanuwatu ta hedehedededi se bado taba ka hededededi, na hekatagomiu ye pilipikalili, matawuwuna ede yomi lapulobai ne se pahili. ¹² Kwa kawamamohoi huyalohaloha, unai komiu taba taulauhekata hekadiyo, na nige gonowamiu, na Yaubada yona hedehedede wa udiyedi taba kabahetubu lauhekatana unai ka hekata'uy-oigomiu. Komiu sola doha wawayao gagilidi meta susu mo kwa numanuma, na nige gonowana kai kwaikwailolona kwa kai. ¹³ Ena hesau susu mo ye numanuma, iya sola wawayaga gabilina, na laulaududulai lauhekatana sola nige kabina ye kata. ¹⁴ Na kai kwaikwailolona meta tamowai lakilakidi siya kadi. Yodi kaikaipate debanawai gonowana namwa yo yababa se kitahinelidi.

6

¹ Unai bena yoda sunuma Keliso unai yona kabahetubu lauhekatadi bagubagunadi ta laugabaeidi, na ta dudu ta lau bena nuwamasalaha saesaena ta hai. Na tabu yoda sunuma kabahetubuna lauhekatadi ta lauhekata'uy-oidi, siya ede: nuwabui laulau yabayababadi udiyedi yo yoda sunuma Yaubada unai, ² babatiso yo kabibolubolu, tauboitai yodi tolo'uyo yo hekasa mayadaina. ³ Yaubada yona yali unai ta sigilau nuwamasalaha saesaena ta hai.

⁴⁻⁶ Tamowai hekadiyo nige gonowana se nuwabui'uyo. Siya wasa namwanamwana se lapuiyako, galewa kain-
 auyadi se miyalobaidiko, Yaluwa Tabuna unai yodi tupwa
 se haiyako, yo Yaubada yona hedehedede yona namwa yo
 basileiya ye laolaoma matadawai gigibwalina se nuwat-
 ulobaidiko. Na ena Yaubada se lausuwalaei meta nige
 gonowana se uyoma se nuwabui'uyo, matawuwuna yodi
 lausuwala ne unai siya Yaubada Natuna se hesahesa-
 taulo'uyoi na tamowai matadiwai iya se hemwadine'uyoi.

⁷ Bwatano namwanamwana unai meta ena nabu ye
 taludobi kewanawai kabo ye mumusi na koya kaidi kaniy-
 odi ye toledi na koya tanuwagana unai namwa ye lobai.
 Tano ne Yaubada unai henamwa ye hai. ⁸ Na bwatano
 unai gwaligwali yo lagau mo se kini na nige yona namwa
 saha hesau, tano ne tanuwagana kabo tano ne ye hedede-
 heyababa. Na gehena unai kabo ye gabu.

⁹ Kehamaiyao, ka hededebayaolaowa kalimiuwai doha
 teina, na iyamo kabina ka kata meta komiu laulau
 namwanamwadi kwa ginaginalidi, siya ede Keliso yona
 kabihemauli unai se masamasalaha. ¹⁰ Yaubada yona
 hekasa se dudulai, unai yomi paisowabayao yo yomi ga-
 dosisi kalinawai taba nige ye nuwaluluhiyeidi. Yomi gado-
 sisi ne kabakitalobaina ede Yaubada yona tamowai meta
 beyabeyana kwa saguidi yo iya ede sola kwa sagusaguidi.
¹¹ Laulauna gonogonowana ka henuwagomiu bena komiu
 kesega kesega kwa miyamiyanamwanamwaei ye lau ee
 huya ta kana siga, to Yaubada yona hededehe-
 sunuma kwa nayatautaubigaidi ne taba se laoma se mamohoi.
¹² Nige ka henuwagomiu bena kwa miyagaibu. Sunuma
 yo taubiga tamowaidi kabo saha Yaubada ye hededehe-
 sunumaedi wa se haidi. Unai ka henuwa bena yodi laulau
 kwa miyawatanidi!

Yaubada yona hededehegunuma taba nige ye bui

¹³ Huyana Yaubada yona hededehegunuma ye mosei Abelahama unai, meta ye bom hesanawai ye hededekaigwala, matawuwuna nige hesau ye saekalili doha iya. Na ye kaigwala ¹⁴ ye wane, “Mamohoi yau kabo ya hededehegunuma na kam isimulita ya hebadodi.” (*Genese 22:17*) ¹⁵ Na Abelahama ye nayatautaubiga na mulinawai saha Yaubada ye hededehegunuma wa ye lobai.

¹⁶ Tamowai maudoidi tamowai saesaedi hesadiyao udiyedi se hededekaigwala. Na tamowai hesau taba saha ye hededeyako, meta hededekaigwala unai ye hemamohoyei. Unai kabo haikawayagala maudoidi ye hekaiyawasidi. ¹⁷ Yaubada ye henuwa bena yona hededehegunuma tauhaidi kalidiwai ye hemasalaha meta taba nige yona hineli ye bui, unai kaigwala wai ye hemamohoyei. ¹⁸ Teina ginauli labui ta, Yaubada yona hededehegunuma yo yona hededekaigwala, kabo nige gonowana ye buidi, matawuwuna nige gonowana ye kailupolupo. Kita taulaoma Yaubada unai sagu ta lobai, iya ede teina ginauli labui ta udiyedi ye henuwa bena ye hebayaoda na yona hededehegunuma udiyedi bena ta tolobayao. ¹⁹ Na yoda tolobayao Yaubada yona hededehegunuma udiyedi meta doha lowo, yaluwada taukabihekahinina bayabayaona. Yoda sunuma ta woyo ye kabigigili na ye lusolalau teha tabukalilina unai. ^{**} ²⁰ Menai Yesu taukedabagunaeda debadawai ye lusolalauko yo ye hemala yoda taukaitalam saesaena ye lau ee nige sigana doha Melekisedeka.

****** **6:19:** Woyo yo teha tabukalilina: Teina ginauli ta meta Isalaela yodi logologu tabuna wa unai (Hebelu 9:1-3). Yoda sunuma ta woyo ye kabigigili na ye lusolalau teha tabukalilina unai: Hedehedede ta meta Yaubada yona kabamiya galewa ne unai heyaheyasonina, na kaniyona ede yoda sunuma ye kabihekahinida Yaubada unai.

7

Melekisedeka iya taukaitalasam namwanamwana na kabo Lewi tamowaidiyao

¹ Teina Melekisedeka ta iya Salema yodi wasawasa yo Yaubada Saesaekalilina yona taukaitalasam tamowaina. Huyana Abelahama wasawasa ye saepwaidi gehena** na yona uyoma magai unai, meta Melekisedeka iya ye hailobai na hededehehenamwa ye mosei Abelahama unai. ² Na Abelahama gogo iyala unai ye hai'uyoidi wa maudoidi luwadiwai yona taiti** ye hai ye mosei Melekisedeka.** Hesa Melekisedeka kaniyona ede “laulaududulai wasawasana”, yo hesa Salema kaniyona ede “nuwadaumwali”, unai iya hinage “nuwadaumwali wasawasana”. ³ Iya nige tamana yo sinana yo kana mumugao yo yona huyatubu yo yona mauli sigana wasadi, na iya meta taukaitalasam tamowaina ye lau huya nige sigana, doha Yaubada natuna. ⁴ Na tamada Abelahama iyala unai gogo ye haidi wa yona taiti ye mosei Melekisedeka, unai ta nuwatulobai meta tamowai ta ye saekalili.

⁵ Laugagayo ye hedede meta taukaitalasam siya ede Lewi kana isimulitao hekadiyo, bena Isalaela tamowaidi maudoidi udiyedi taiti se tanoi. Tamowaidi ta meta siya kadi kahao, na maudoidi ta Abelahama unai se tubuma. ⁶ Teina Melekisedeka ta iya nige Lewi kana boga hesau, na iyamo taiti ye hai, yo hinage Abelahama, iya hededehesunuma tauhaina wa, ye hededehehenamwa. ⁷ Nige gonowana ta nuwapwanopwano, matawuwuna

** 7:1: Genese 14:1-16 ** 7:2: Taiti kaniyona ede, gogo o moni ta soiyedi gwau badodi saudoudoi udiyedi na gwau kesega ta hai ede taiti, doha teina: Ena tamowai yona moni 100 Kina, meta 10 Kina kabo ye mosei Yaubada unai. O yona puwaka 10, meta kesega ye mosegabaei Yaubada unai.

** 7:2: Genese 14:17-20.

maudoida kabina ta kata meta tamowai dobidobina hededehenamwa ye hai tamowai saesaena unai. ⁸ Taiti tautanotano ne, siya kabo se boita. Na taiti tauhaina hesau ede Melekisedeka, na Yaubada ye hedehedede meta iya kabo ye miya ye lau nige kana siga. ⁹ Unai gonowana kabo ta wane, Abelahama taiti yona tolona ta meta Lewi hinage taiti ye tole, ¹⁰ matawuwuna ede huyana Melekisedeka Abelahama ye hailobai, meta Lewi iya sola kana mumuga Abelahama tauna luwanawai.

Yesu taukaitalasam saesaena doha Melekisedeka

¹¹ Taukaitalasam Lewi unai tautubuma wa yodi paisowa yona kabalaoma ede Mose yona laugagayo. Na iyamo taukaitalasam ne nige gonowadi tamowai yodi yababa udiyedi se tolehedulaidi. Unai Yaubada taukaitalasam hesau ye hetamaliyama, iya ede doha Melekisedeka, na nige doha Aloni. ¹² Teina unai Yaubada taukaitalasam yona paipaisowa ye bui, ede laugagayo hinage ye bui. ¹³ Teina hedehedede maudoidi ta tamowaina wa meta iya nige Lewi kana isimulita hesau, na iya boda udoi. Na tenem boda ne unai meta nige tamowai hesau kaitalasam paisowana ye ginauli. ¹⁴ Ye masalaha meta yoda Guiyau iya Yuda kana isimulita, na Mose nige saha ye hedede bena taukaitalasam hesau Yuda kana boda unai kabo ye tubuma. ¹⁵ Yo saha ka hedede ta ye masalahakalili, ena taukaitalasam hesau doha Melekisedeka ye masalahama. ¹⁶ Nige kana mumuga laugagayona debanawai na ye hemala taukaitalasam, na yona mauli nige gonowana se hegehe ne yona gigibwali debanawai. ¹⁷ Matawuwuna Yaubada ye hededeyako ye wane,

“Kowa taukaitalasam miyamiyahaina doha Melekisedeka.” *(Same 110:4)*

¹⁸ Laugagayo yo kabikabidi bagubagunadi wa Yaubada ye tolehesuwaladi matawuwuna ede se basabasa yo nige

kaniyodi, ¹⁹ matawuwuna laugagayo ta nige gonowana tamowai se tole hededulaidi. Na Yaubada hededehe sunuma namwanamwadi ye ledima, se saguida na udiyedi kabo gonowana ta sigilau Yaubada unai.

²⁰ Laugagayo yo kabikabi hauhauna ta Yaubada ye hetubu na hededekaigwala ye ginauli Yesu unai. Na nige hededekaigwala hesau ye ginauli taukaitalasam tamowaidiyao bagubagunadi udiyedi. ²¹ Na huyana Yesu ye hemala taukaitalasam, Yaubada hededekaigwala ye ginauli ye wane,

“Guiyau ye kaigwalako,

yo iya taba nige nuwana ye bui:

Kowa kabo taukaitalasam ye lau ee huya nige sigana”

(Same 110:4)

²² Teina hededekaigwala ta debanawai Yesu ye hemala talam namwanamwana tauhaiyamana yo tauhebayaona. Talam ne ye namwakalili na kabo talam beyabeyana.

²³ Taukaitalasam Lewi unai tautubuma wa meta se badokalili, matawuwuna boita ye hekaiyawasidi, unai kadi paisowa nige se laei sigana unai. ²⁴ Iyamo Yesu ye miya ye lau nige sigana, unai iya ye hemala taukaitalasam miyatahitahina. ²⁵ Unai iya gonowana tamowai ye hemauidi, siya ede tamowaidiyao Yesu debanawai se laoma Yaubada unai. Matawuwuna iya ye miya ye lau nige kana siga na huya maudoina kabo yodi ye kaikaibwada.

²⁶ Ye namwakalili to yoda taukaitalasam saesaena ede Yesu, matawuwuna iya tabuna, nige kana giluhesau, ye a'a, iya tamowai yodi yababa nige ye patulau udiyedi, yo galewa ne unai ye saekalili. ²⁷ Taukaitalasam saesaedi Lewi kana isimulitao, siya bena mayadai badobado kaitalasam se ginaginaulidi, bagubaguna se bom yodi yababa hesabadi na kabo tamowai maudoidi yodi yababa hesabadi. Na Yesu meta udoi. Iya tamowai yodi yababa

maudoidi debadiwai kaitalasang kesega mo ye ginauli huyana ye mose'uyoi sataulo ne unai.

²⁸ Tamowai se basabasakalili, na iyamo laugagayo debanawai se hemala taukaitalasang saesaedi; na laugagayo mulinawai hededekaigwala ye laoma, na unai Yaubada Natuna ye kaisunuwai ye hemala taukaitalasang saesaena. Yaubada iya ye tolehedulaimamohoyei ye lau ee nige kana siga.

8

Yesu yoda taukaitalasang saesaena talam hauhauna wa unai

¹ Kai saha ka hedehededei ta meta iya ede teina: Kita yoda taukaitalasang saesaena ye tutuli Yaubada namana-malikalilina yona telona nimatutunawai galewa ne unai, ² yo kabataba'ohu unai ye paipaisowa. Kabataba'ohu ta logulogu tabuna mamohoina Guiyau ye ginauli na nige tamowai se ginauli.

³ Laugagayo ye hedede meta bena taukaitalasang saesaedi maudoidi yodi kainauya yo kaitalasang se moseidi. Gonogonowana doha hinage teina yoda taukaitalasang saesaena ta bena kaitalasang hesau ye mosei Yaubada unai. ⁴ Ena taba iya tanoubu ta unai, taba nige ye hemala taukaitalasang, matawuwuna tanoubu ta unai meta taukaitalasang tamowaidiyao nonohadi, siya ede kaitalasang se moseidi Yaubada unai, doha laugagayo ye hededehemasalahayako wa. ⁵ Yo siya yodi kabakaihelahui, iya ede logulogu tabuna ne, meta galewa ne unai logulogu tabuna mamohoina kabakitana yo tautauna. Unai ede huyana Mose bena logulogu tabuna ta ye ginauli, Yaubada ye hededebayaolau unai ye wane, “Ku kitalau kabikabina tautauna maudoina kuduli ne unai ya hekitago wa meta ku ginauliwatani.” *(Esodo*

25:40) ⁶ Na taukaitalasang saesaena paisowana Yesu ye hai wa ye namwakalili na kabo Lewi tamowaidiyao yodi paisowa, gonogonowana doha talam iya ye haiyama wa ye namwakalili na kabo talam bagubagunana wa. Na talam hauhauna ta yona kabatolo ede hededehe sunuma namwanamwadiyao. Hededehe sunuma ta se namwakalili na kabo hededehe sunuma bagubagunadi wa.

⁷ Taba ena talam bagubagunana wa unai nige laupwano, meta Yaubada taba nige talam helabuina ye leyama. ⁸ Na Yaubada Isalaela tamowaidi udiyedi laupwano ye lobai ede ye wane,

“Guiyau ye wane: Huyana ye laolaoma,
 yau kabo talam hauhauna ya ginauli
 Isalaela yo Yuda tamowaidiyao udiyedi.

⁹ Kadi mumugao nige yogu talam beyabeyana wa se sunumaei,
 ede ya lausuwalaedi.

Unai talam hauhauna ta kabo nige doha siya udiyedi ya ginauli wa,
 huyana nimadi udiyedi ya kabi na Aikupito unai ya woyahepesadi wa.

¹⁰ Na Guiyau ye wane: Teina talam ta kabo ya ginauli Isalaela tamowaidi udiyedi,
 tenem huya ne mulinawai.

Yau yogu laugagayo kabo ya toledi kuludi ne udiyedi
 yo ya kulidi nuwadi ne udiyedi.

Yau kabo yodi Yaubada,
 yo siya yau yogu tamowai.

¹¹ Huyana ne taba nige tamowai hesau helena taumiya ye hekata
 yo taba nige ye hededelau kana kaha unai ye wane,
 ‘Guiyau taba kabina ku kata,’
 matawuwuna siya maudoidi gagilidi ye sae lakilakidi

kabo kabigu se kata.

¹² Yau yodi laulau yabayababadi kabo ya hededegilidi yo yodi ba'aya taba nige ya nuwatu'uyoidi.” (*Yelemaiya 31:31-34*)

¹³ Na teina talam ta Yaubada ye katai Talam hauhauna, unai talam bagubagunana wa ye beyabeyako. Na saha ye beyabeyako yo nige yona gigibwali meta kabo ye tauwadam.

9

Yaubada kaihelahuina logulogu tabuna wa unai

¹ Talam bagubagunana wa meta yona kaihelahui laugagayodi yo kabikabidi, yo hinage tanoubu ta unai kabataba'ohu se ginauli. ²⁻³ Kabataba'ohu ta meta logulogu tabuna kaleko unai se ginauli, na kalona ne unai meta kaleko unai se woyo'utusi na ye hemala dahala labui. Na dahala bagubagunana wa unai meta lampa haligigilabui yodi kabatolo ye totolo, yo hinage pwalawa tabudi ma hatahatana** menai. Teina dahala ta hesana ede Teha tabuna. Na woyo kalekona dagelanawai meta dahala hesau hesana ede Teha tabukalikalilina**. ⁴ Dahala ta unai kabakaitalasam hatahatana gole unai se ginauli, meta inisenisi kabagabuna. Yo talam keisina** gole unai se suma wa hinage temenai. Teina keisi ta kalonawai meta mana** kaba'usaidi gole unai se ginauli wa, yo Aloni yona tuke ye bwagu wa, yo laugagayo saudoudoi wekudi tabatabadiyao labui** wa. ⁵ Keisi wa kewanawai selu-

** **9:2-3:** Lewitikasi 24:5-9, Maleko 2:26, yo Esodo 25:23-30 ** **9:2-3:** Teha tabukalikalilina hesana ta se tole matawuwuna iya ede Yaubada yona kabamiya tanoubu ta unai. ** **9:4:** Talam keisina: Kalina dimdim unai se hedehedede *ark of the covenant*. Teina hedehedede ta *ark* kaniyona ede keisi. ** **9:4:** Mana meta hededehehemalahana GLOSSARY unai ku hasili (↑Mana). ** **9:4:** Esodo 34:1

bim** didididigadi labui se tutuli. Pepedi se kaladi na ba'aya kabahededegegigilina tehana wa se helogulogu. Na ginauli maudoidi ta hedehedededi se badokalili, na nige gonowana ta hetalahegehedi.

⁶ Huyana ginauli maudoidi se tolehekanonohaidi doha teina, kabo taukaitalasam se mwalamwalaeh dahala bagubagunana unai, mayadai badobado temenai yodi kaihelahui kabikabidi se ginaginaulidi. ⁷ Na taukaitalasam saesaena ye bom mo kabo bolimai kesega kesega luwadiwai mayadai kesega mo unai ye mwalaesae teha tabukalikalilina unai, na yona mwalaesae ne unai meta bena kwasina ye bahei. Teina kwasina ta meta iya yo tamowai maudoidi yodi yababa nige se nuwatulobaidi wa hesabadi na menai Yaubada matanawai ye lausibusibuyei. ⁸ Taukaitalasam saesaena ye bom mo gonowana ye mwalaesae dahala tabukalikalilina unai. Teina unai Yaluwa Tabuna ye hemasalaha kalidawai meta huyana logulogu tabuna bagubagunana sola ye totolo meta kabalusae teha tabukalikalilina kedana nige sola ye tasoke. ⁹ Teina talam bagubagunana kabikabidiyao ta meta teina huya ta kita yoda kabakita. Ye hekitada meta tautaba'ohu yodi kainauya yo kaitalasam se mosemoseidi Yaubada unai wa, meta taba nige gonowana nuwadiyao se he'a'adi. ¹⁰ Matawuwuna teina kainauya yo kaitalasam ta meta siya ede kai, numanuma, taudi yo gogo deulihe'a'adi kabikabidi mo. Tamowai teina kabikabi ta se ginaulidi meta dagelagaibudi mo se he'a'adi, na nuwadiyao meta nige se buidi. Na Yaubada yona nuwatu meta bena tamowai tenem kabikabi ne se ginaginaulidi ye lau ee kabikabi hauhauna ta ye lage.

Keliso kwasinana hedehededena

** 9:5: Selubim meta anelu kao hesau (↑Selubim).

¹¹ Na Keliso ye laoma ye hemala ginauli namwanamwadi se laomako wa yodi taukaitalasam saesaena na logulogu tabuna unai ye lusola. Teina logulogu tabuna ta ye saekalili yo ye namwakalili na kabo tanoubu unai ta. Nige tamowai nimadiwai se ginauli, yo iya meta nige doha tanoubu ta ginaulina hesau. ¹² Yesu yona lusola wa unai meta nige gouti o bulumakau natuna hakiyana kwasinana ye hepaisowa, na ye bom kwasinana mo ye bahei na ma kesega mo ye lusola teha tabukalikalilina wa unai, na unai yoda kabihemauli miyatahitahina ye ginauli. ¹³ Kabikabi bagubagunana unai, ena Yaubada matanawai tamowai nige se a'a**, meta kabo taukaitalasam ne gouti o bulumakau hakiyadi kwasinadi unai se lausibusibuyei, o bulumakau baisinana saehauna kahusana se hesulusae kewadiwai. Unai kabo se tabu'uyo. Iyamo teina ta meta dagelagaibudi mo se a'a. ¹⁴ Na Yaluwa Tabuna Miyamiyahaina Yesu ye hebayao na ye bom ye mose'uyoi Yaubada unai. Na iya meta nige yababana hesau. Unai ede Keliso kwasinana ye gigibwalikalili na kabo suisui kwasinadi. Kabahemwaloida laulaudiyao udoi'udo udiyedi Keliso kwasinana nuwadao ye he'a'adi, to bena Yaubada Maumaulina ta kaihelahui. ¹⁵ Keliso yona kaitalasam debanawai ede iya talam namwanamwakalilina tauhetubuna. Talam bagubagunana wa unai na tamowai saha se ginaulipwanolidi wa ba'ayadi maudoidi hesabadi ye boita na unai ye hemaisahaidi yo yailihai ye moseidi. Unai talam hauhauna ta meta kaiteyadi Yaubada ye yoganeidi wa bena Yaubada yona hededehesunuma

** **9:13:** Yaubada matanawai tamowai nige se a'a kaniyona ede tamowai wa nige gonowana se mwalae logulogu tabuna bakubakuna unai se kaitalasam yo se tapwalolo, matawuwuna yababa saha hesau ye ginauli o laugagayo hesau ye utusi.

gogodi miyamiyahaidiyao se haidi.

¹⁶ Na huyana tamowai hesau yona gogo hekasana pepwana ye kulikauli na ye boitagabaei, meta nige gonowana tamowai hesau ye kabilau gogo ne udiyedi kana siga se hemamohoyei meta pepwa ne taukulina ede ye boitako.

¹⁷ Ena taukulina ta ma miyana meta nige gonowana tamowai hesau gogo hekasana pepwana ta ye hepaisowa na unai ginauli saha ye hededehe sunuma wa ye hai. Teina pepwa ta nige gonowana ye paisowa kana siga ee taukulina ta ye boita. ¹⁸ Doha hinage talam bagubagunana wa nige yona gigibwali ye lau ee kwasina unai se hemamohoyei. ¹⁹ Mose Yaubada yona laugagayo maudoidi ye hedede gabaedi tamowai udiyedi, na muliyena bulumakau natudiyao yo gouti kwasinadi yo waila ye haidi na mamoe wiyana pulupululuna yo hisopa** lagadi ye hepaisowadi na Yaubada yona laugagayo bukana yo tamowai maudoidi udiyedi ye lausibusibuidi ²⁰ na ye wane, “Teina kwasina ta meta Yaubada yona talam kalimiuwai wa kabahemamohiyena.”

(Esodo 24:7-8)

²¹ Laulau kesekesegana unai kwasina ye lausibusibuyei logulogu tabuna unai yo kabakaihelahui gogodi maudoidi udiyedi. ²² Mamohoi, laugagayo ye hedede meta ginauli se bado bena kwasina unai se he'a'adi. Taba bena kwasina nige ye bwalili, nige yababa kabahededegigilina hesau.

²³ Teina ginauli ta meta siya ede galewa gogodiyao tautaudi, yo kabahe'a'adi meta suisui kwasinadi. Na galewa ginaulidi kabahe'a'adi meta ye saekalili na kabo suisui kwasinadi, ²⁴ matawuwuna Keliso nige ye lusae logulogu tabuna tamowai nimadiwai se ginauli wa unai.

** 9:19: Hisopa meta kaiwa gagilina kuyakuyawana Isalaela tehadi udiyedi ye kinikini. Kaiwa ne nige kalidawai, na kita kaiyalu lagana gagilina ta hepaisowa unai ta lausibusibu. Na Buka Tabuna unai hesa hisopa mo ta hepaisowa.

Na ye lusae galewa ne unai logulogu tabuna mamohoina ne unai. Temenai ye masalahalau Yaubada matanawai kita hesabada. ²⁵ Hinage ye lusae galewa ne unai nige bena huya badobado ye bom ye kaikaitalasamyei'uyoi, doha taukaitalasam saesaena bolimai kesega kesega ye lusae teha tabukalikalilina unai ye kaikaitalasam, na kwasina ye bahei wa meta nige iya ye bom kwasinana. ²⁶ Ena taba Keliso yona kaitalasam ne ye ginaginauli'uyoi, meta huyana Yaubada tanoubu yona hetubuna wa unai ye laoma ee teina kabo ye kamkamna ma gwauna. Na huya gehena ta unai ye laoma ma kesega mo ye kaitalasam'uyoi bena ba'aya ye tolehesuwaladi. ²⁷ Doha ede tamowai ye boita ma kesega mo na mulinawai kabo ye masalaha hekasa mayadaina unai, ²⁸ hinage Keliso ye boita ma kesega mo na kaitalasam ye ginauli tamowai gwaudi yodi yababa kabalaehesuwalana. Na kabo ye uyoma nige bena tauba'aya hesabadi, na tenem huyana ne unai kabo mauili nige sigana ye moseidi iya taunayanayaeina tamowaidiyao ne udiyedi.

10

Keliso ma kesega mo ye kaitalasam

¹ Laugagayo Mose unai se laoma wa meta ginauli namwanamwadi se laolaoma ne tautaudi mo, nige mamohoidiyao. Unai ede kaitalasam kesekesegadi tamowai se ginaginauli'uyoidi bolimai badobado, na udiyedi taba nige gonowana taukaihelahui ne se hedudulaidi. ² Ena taba laugagayo wa tamowai se hedudulaidi kabo gonowana kaitalasam wa se kaiyawasi. Matawuwuna ena taba kaitalasam kesega mo unai taukaihelahui wa se a'ako, kabo nige gonowana yodi yababa se nuwatu'uyoidi. ³ Na tenem kaitalasamdi ne meta ba'aya kabahenuhenuwaisinidi

bolimai badobado, ⁴ matawuwuna bulumakau yo gouti hakiyadi kwasinadi nige gonowana ba'aya se haigabae.

⁵ Tenem unai, huyana Keliso ye dobima tanoubu ta unai meta ye wane,

“Kaitalasam yo kainauya nige ku henuwadi,
na yau taugu ta ku kabinonohai yogu.

⁶ Kaitalasam gabugabudi yo ba'aya kabahededegilina kainauyadi
nuwam nige se henamwa.

⁷ Na kabo ya wane, ‘Yaubada, yau ede te, doha buka unai se kuliyako,

ya laoma kowa yom nuwatu bena ya ginauli.’ ” (*Same 40:6-8*)

⁸ Bagubaguna Keliso ye hedede ye wane, “Kaitalasam yo kainauya meta siya kaitalasam gabugabudi yo kaitalasam ba'aya hesabadi nige ku henuwadi yo nige nuwam se henamwadi.” (Iyamo laugagayo ye hedede bena se ginaulidi.) ⁹ Na ye hedede'uyo ye wane, “Yau ede te, ya laoma kowa yom nuwatu bena ya ginauli.” Teina hedehedede ta udiyedi talam bagubagunana wa ye tolehesuwala na helabuina ye haiyama. ¹⁰ Na Yaubada yona nuwatu unai ye tolehesuwalada yona tamowai, Yesu Keliso tauna kaitalasamna kesegana wa debanawai.

¹¹ Talam bagubagunana wa unai mayadai kesega kesega taukaitalasam maudoidi yodi paisowa se ginaginaulidi. Kaitalasam kesekesegadi se moseidi Yaubada unai na nige gonowana udiyedi ba'aya se haigabaeidi. ¹² Na teina taukaitalasam saesaena ta ba'aya kaitalasamna ma kesega mo ye ginauli, na mulina ne unai ye sae Yaubada nimatuutuuna unai ye tuli. ¹³ Temenai ye nayanaya ye lau ee kana siga kana waiunu Yaubada ye toledi kaena kadi duku. ¹⁴ Matawuwuna tenem kaitalasam kesega ne unai kaiteyadi ye tolehesuwaladi siya Yaubada yona tamowai

ne meta ye tolehedudulaimamohoiyeidi ye lau nige kana siga.

¹⁵ Yaluwa tabuna teina ta hinage ye hemasalahayako kalidawai. Doha bagubagunawai ye wane,

¹⁶ “Guiyau ye hedede ye wane, ‘Teina talam ta kabo ya ginauli Isalaela tamowaidi udiyedi, tenem huya ne mulinawai.

Yau yogu laugagayo kabo ya toledi kuludi ne udiyedi yo ya kulidi nuwadi ne udiyedi.’” (*Yelemaiya 31:33*)

¹⁷ Na kabo ye hedede'uyo ye wane, “Yodi ba'aya yo laulau yabayababadi meta yau taba nige ya nuwatu'uyoidi.” (*Yelemaiya 31:34*)

¹⁸ Na huyana Yaubada ba'aya ye hededegigilidi meta tamowai nige gonowana kaitalasam hekadi se ginauli'uyoidi.

Sunuma hededehebayaona

¹⁹ Kehaguwao, Yesu kwasinana debanawai ta nuwabayao na ta lusae galewa teha tabukalikalilina ne unai. ²⁰ Yesu teina keda hauhauna ta ye sokeyako kita hesabada yo gonowana unai kabo mauli ye leyama kalidawai. Woyo tapulisina ne iya ede Yesu tauna, unai kabo gonowana ta lau Yaubada unai. ²¹ Yo hinage yoda taukaitalasam saesaena iya Yaubada yona tamowai taukitahettedi. ²² Tenem nuwatu maudoidi ta debadiyena taba kwa laoma ta sigi ta lau Yaubada unai ma nuwamamohoida yo ma sunumada. Matawuwuna yoda nuwatu yabayababadi Keliso kwasinana unai ye lausibusibuyeidiko na ye he'a'ada, yo tauda waila a'ana unai ye deulidiko. ²³ Taba ta tolobayao na Yaubada yona hededehesunuma ta hededehemasalahadi tamowai udiyedi ta bena ta kabihekahini, matawuwuna Yaubada saha ye hededehesunuma kalidawai wa kabo ye hemamohoiyei. ²⁴ Na bena ta nuwanuwatu

kabo idohagi na ta haihebahebayao'uyoida gadosisi yo laulau namwanamwadi udiyedi. ²⁵ Tabu yoda tapwalolo koikoigogodi ta miyasuwalaedi doha tamowai hekadi yodi miyamiya ne. Bena yoda sunuma unai ta haihebahebayao'uyoida, matawuwuna kabina ta kata meta yoda Guiyau yona uyoma mayadaina ye hanahanauma.

²⁶ Ena kita Yaubada yona hedehedede mamohoina ne kabina ta kata na sola ba'aya unai ta miyamiya, meta nige kaitalasam hesau'uyo kabo ba'aya ne ye haigabaeidi, ²⁷ na ma matamatausida hekasa mayadaina yo Yaubada kana waiunu kabaheyababadi kaiwana kalakalasinna ta nayanayaidi. ²⁸ Ena tamowai hesau Mose yona laugagayo ye laukwatakwataei na tamowai labui o haiyona se kita yo se hemamohoiyei, kabo se unuheboita, nige gonowana se katekamkamnaei.** ²⁹ Yomi nuwatu idohagi? Ena tamowai hesau Yaubada Natuna nige ye hekasisiyei yo talam kwasinana wa ye hai doha ginauligaibu, yo nige ye mode meta teina kwasina ta kabo yona yababa ye deuligabaedi Yaubada matanawai, yo Yaluwa iya ginauli namwanamwadi ye kainauyaida ye hededeheyababa meta kabo kamkamna sahasahana ye hai? ³⁰ Tauhedehededena kabina ta katako, ye hedede ye wane, “Yau kabo ya haigum, yo hekamkamna meta yau ya ginauli,”

(Dutelonomi 32:35)

yo ye hedede'uyo ye wane, “Guiyau kabo yona tamowai ye hekasadi.”

(Dutelonomi 32:36,

Same 135:14) ³¹ Unai ginauli nuwamatamatausikalilina ede hekamkamna Yaubada Maumaulina nimana unai kabo tamowai se hai ne.

³² Na huya bagubagunana unai Keliso wasana kwa hai wa kwa nuwanuwatui. Tenem huyana ne unai

**

10:28: Dutelonomi 17:6

kamkamna lakilakina kwa hekalo, na iyamo yomi sunuma unai kwa tolobayao. ³³ Huya hekadiyo tamowai komiu Yesu tausunumaena se haigomiu na boda matadiwai se hededeheyababagomiu yo se hekamkamnagomiu, yo huya hekadiyo kamkamna kesekesegadi tauhaidi wa kwa saguidi. ³⁴ Kami kahao numatutugudu unai se toledi wa kwa katekamkamnaedi, yo huyana yomi gogo se haidi wa meta kwa gwauyala, matawuwuna kabina kwa kata meta yomi gogo namwanamwadi yo miyamiyatahitahidi siya ede galewa ne unai.

³⁵ Unai tabu yomi sunuma kwa gabaedi. Kainauyana lakilakina kabo Yaubada unai kwa hai. ³⁶ Yomi sunuma unai taba kwa tolobayao, yo huyana Yaubada yona nuwatu kwa ginaulihegehedi sigana unai, saha ye hededehesunuma wa kabo kwa hai. ³⁷ Na huyakubwakubwa mo
“taulaoma ne kabo ye lagema na taba nige ye pahili.

³⁸ Na yogu tamowai dudulaina sunuma debanaena kabo ye miya;
na ena ye mulisigisigi
yau taba nige nuwagu ye namwa kalinawai.”
(*Habakuku 2:3,4*)

³⁹ Na kita meta nige taumulisigisigi tamowaidiyao. Ena tamowai hesau ye mulisigisigi Yaubada kabo ye heyababa. Na kita meta tausunuma tamowaidiyao, mauli nige kana siga tauhaidi.

11

Tausunuma tamowaidiyao wasadi

¹ Yoda sunuma kaniyona ede ta kawamamohoi yo nige nuwadao se labulabui meta Yaubada yona hededehesunuma ta nayanayaidi ne kabo se tubu, yo ginauli saha sola nige ta kitadi kabo se masalaha. ² Kada mumugao

yodi sunuma kana kao ede doha teina, unai Yaubada ye hededetausaedi.

³ Sunuma debanawai ta nuwatulobai meta Yaubada ginauli maudoidi ye hetubudi yona hedehedede unai. Na saha ta kita ne meta ginauli nige masamasalahadi udiyedi ye masalaha, Yaubada yona hedehedede unai.

⁴ Sunuma debanawai Abela kaitalasang namwanamwana ye mosei Yaubada unai, na kabo Kaina yona kaitalasang. Na Yaubada Abela yona kainauya ye kitahenamwa na yona sunuma debanawai ye hededetausae meta iya tamowai dudulaina. Abela ye boitako, na iyamo yona sunuma wasana sola iya ede ta lapulapui.

⁵ Sunuma debanawai Yaubada Enoke ye hai ye saei galewa, ede iya nige boita ye lobai. Makesega ye tauwadam, matawuwuna Yaubada iya ye haiyako. Na huyana sola nige ye sae galewa, Yaubada iya ye hededetausae meta iya nuwana ye henamwa. ⁶ Na ena nige yoda sunuma, meta nige gonowana Yaubada nuwana ta henamwa. Matawuwuna nige gonowana tamowai hesau ye laoma Yaubada unai kana siga ye kawamamohoi meta Yaubada iya maumaulina yo miyamiyahaina, yo hinage bena ye kawamamohoi meta Yaubada iya tauwaseneina ye kainauyaidi.

⁷ Sunuma debanawai ginauli sahasahadi sola nige se masalaha wa Yaubada ye hededehemasalahanonohaidi Nowa unai, na Nowa Yaubada ye hekasisiyei yo yona sunuma debanawai ake^{**} ye ginauli bena yona numata tamowaidi ye hemaulidi. Saha ye ginauli ta unai Nowa

****** **11:7:** Teina hedehedede ta ake nige kalina Saliba, na kalina Hebelu unai ta hai. Na kaniyona ede keisi. Nowa waga ye kabi wa hinage ta hedede ake, iya meta keisi lakikalikalilina. Nowa wasana ede Genese 6:5 unai ye hetubu. Keisi hesau wasana ta hasili Hebelu 9:4 unai, iya ede talam keisina.

tanoubu tamowaidiyao kadi gilū ye hemasalaha, na ye hemala laulaududulai tamowaina Yaubada matanawai.

⁸ Sunuma debanawai Abelahama Yaubada ye kawakabiyei, huyana ye yoganei bena ye lau tano hesau unai. Tano ne Yaubada ye hededehe sunuma bena huya mulinawai kabo ye hemala yona tano mamohoina. Yaubada ye kawakabiyei na ye lau, na nige kabina ye kata haedi ye laulau. ⁹ Yona sunuma debanawai hededehe sunuma tanona unai ye miya doha laolaoma. Yo tenti unai ye miyamiya doha hinage natuna Isako yo wahana Yakobo, na siya meta hededehe sunuma kesekesegana tauhaina. ¹⁰ Abelahama teina laulau ta ye ginaulidi matawuwuna magai miyamiyahaina ye nayawatani. Magai wa taunuwatuhekasana yo tauginaulina ede Yaubada.**

¹¹ Huyana Abelahama ye tautaubadakaliliko yo mwana Sala ye kobosi, meta Abelahama yona sunuma debanawai Yaubada ye hebayao na ye hemala tama, matawuwuna ye kawamamohoi meta saha Yaubada ye hededehe sunumayako wa kabo ye ginauli. ¹² Unai tamowai tautaubadakalilina ta kana isimulitao meta se badokalili doha galewa kipwaladi yo salagomgom nagalidi. Nige gonowana ta hasilidi.

¹³ Teina tamowai ta ma sunusunumadi na se boita. Na saha Yaubada ye hededehe sunumadi wa sola nige se haidi. Na kedalohalohawai mo se kitakitalaedi yo se gwayualaedi. Yo se hededehe masalaha'uyoidi meta siya laolaoma yo yodi magai mamohoina nige tanoubu ta unai.

¹⁴ Tamowai yodi hedehedede doha teina ye hemasalaha meta basileiya hesau se wasewasenei bena kabo se hai yodi. ¹⁵ Ena taba tano se laugabae wa se nuwanuwatui, meta kabo gonowana se uyoko hesabana. ¹⁶ Iyamo se

** 11:10: Hemasalaha 21:10-14

henuwa magai namwanamwana se nayanayai iya ede galewa ne unai. Unai Yaubada nige ye mwadine bena iya se katai yodi Yaubada, matawuwuna yodi magai lakilakina ye kabinonohaiyako.

¹⁷⁻¹⁸ Huyana Yaubada Abelahama ye laukita kabo Abelahama iya natuna Isako ye kaitalasamyeyi, matawuwuna yona sunuma. Yaubada ye hededehesunumayako meta Isako unai kabo kana isimulitao se masalaha, na iyamo Abelahama Yaubada yona hededehesunuma tauhaina wa ye yali bena natukesekesegana ye kaitalasamyeyi. ¹⁹ Abelahama ye nuwatui meta taba Isako ye boita, Yaubada gonowana kabo ye hemaui'uyoi. Na saha ye tubu wa meta doha Abelahama natuna Isako boita unai ye hai'uyoi.

²⁰ Sunuma debanawai Isako iya natunao labui Yakobo yo Iso ye hededehenamwadi yo ye hededehemasalaha ginauli sahasahadi kabo se tubu kalidiwai.**

²¹ Sunuma debanawai Yakobo, huyana yona huyaboita ye hanahanauma, meta Yosepa natunao labui ye hededehenamwadi yo yona tuke unai ye kabi ye totolo na Yaubada ye kaihelahui.**

²² Sunuma debanawai Yosepa yona huyaboita ye hanahanauma ede ye hededehemasalaha meta Yaubada kabo Isalaela tamowaidiyao Aikupito unai ye woyahepesadi, yo saha ye henuwa bena siyadana ne unai se ginauli, meta ye hededenonohai.

²³ Huyana Mose se labasi, na sunuma debanawai tamana yo sinana iya se tolewadam waikena haiyona, matawuwuna iya se kita meta kana kao ye namwakalili na Palao** yona laugagayo nige se matausiyei.

** **11:20:** Genese 27:27-29,39 ** **11:21:** Ye totolo na Yaubada ye kaihelahui: Tem huya ne unai tamowai se totolo na se tapwalolo.

** **11:23:** Palao meta Aikupito yodi wasawasa.

²⁴ Sunuma debanawai huyana Mose ye tubusae meta nige ye henuwa bena se hedede iya Palao natuna waihiu wa natuna,** ²⁵ na ye henuwa bena Yaubada yona tamowai maiyanao se kamkamna, na nige bena huyakubwakubwa mo yababa gwauyalana ne unai ye gwauyala. ²⁶ Ye nuwatui meta ye namwa mo taba ye kamkamna Keliso debanawai na kabo Aikupito yona gogo wasawasadi gadosisidi ne, matawuwuna iya ye kitakitalau yona kainauya ye laolaoma ne hesabana. ²⁷ Sunuma debanawai Mose Aikupito ye laugabaei na wasawasa yona kouyalayala nige ye matausiyei. Yona sunuma unai ye tolokesegai, matawuwuna yona kamna ne unai doha Yaubada iya ede wadawadamna ye kita. ²⁸ Sunuma debanawai Mose ye hededelau Isalaela tamowaidi bena taukiuli kabikabina yo kwasina hesaudi kawakeda duudi udiyedi se ginaulidi, unai taba nige taukaiunu aneluna Isalaela natudiyao tau-taubaguna ye unuidi.**

²⁹ Sunuma debanawai Isalaela tamowaidiyao Gabwa Pulupululuna unai se kawasi kana kao doha tano pitapitalina; na huyana Aikupito tamowaidiyao se kaipate bena se hemuliwatanidi ede siya maudoidi se yoli.

³⁰ Sunuma debanawai Isalaela tamowaidiyao Yeliko ganana se tauhetakikili mayadai haligigi-labui na kabo gana wa ye ulugwaligwali.

³¹ Lahaba Yeliko waihiuna yo iya tauna ye lokulokunegabae waihiuna, meta yona sunuma debanawai nige se koihemwaloi doha taukawayagala maudoidi wa, huyana Isalaela tamowaidiyao Yeliko magaina se heyababa, matawuwuna Isalaela yodi taukaikewasipwa ye saguidi.**

** 11:24: Esodo 2:10-12 ** 11:28: Esodo 12 ** 11:31: Ye saguidi meta buka unai yodi kulikuli kalina Giliki unai wa se kuli, ye yogaisinidi ma nuwadaudaumwalidi (Yosuwa 2:1-21 yo 6:22-25).

³² Kabo saha hesau ya hedede'uyoi? Nige yogu mahana gonowana bena kabo Gidiyoni, Balaki, Samasona, Yepeta, Dawida, Samuwela yo peloweta maudoidi yodi sunuma wasadi ya hasilidi. ³³ Teina tamowaidiyao ta yodi sunuma debadiwai basileiya hekadi se saepwaidi, yo kabikabi dudulaidi se ginaulidi, yo Yaubada saha ye hededehesunumadi wa se haidi. Siya hinage laiyoni kawadi se koiguidi tabu se kaitau, ³⁴ yo kaiwa kalapulupululudi se hebosodi, yo iyala kelepana unai bena se unuidi na se wasabugabaei. Yaubada yodi basabasa ye buidi na se bayao, na iyala unai se bayaokalili na kadi waiunu se henakudi. ³⁵ Sinesineo kehadiyao yodi taubota boita unai se hai'uyoidi.** Tamowai hekadiyo meta se hekamkamnaliliyeidi, na iyamo nige se henuwayailihai, na se henuwa bena se boita matawuwuna kabina se kata meta boita mulinawai kabo se tolo'uyo na mauli namwanamwana se hai. ³⁶ Hekadi se talatalawasiyedi yo wipi udiyedi dageladi se sapikopadi, yo hekadiyo nimadi yo kaedi se senidi yo numatutugudu udiyedi se toledi. ³⁷ Hekadi se hekalawekudi; hekadi sowala udiyedi se boliduwaduwalidi, hekadi kelepa udiyedi se unuhemwaloidi. Na teina tamowaidiyao ta meta se dehakalili, ede mamoe yo gouti dahidi se likwadi na se sae yo se dobi, yo tamowai siya se hekamkamnadi yo se kabi-henayaidi. ³⁸ Siya se namwakalili Yaubada matanawai, na tanoubu ta tamowaidiyao siya nige se kitahenamwadi. Unai se sae yo se dobi balabalagaibu yo koya tupidi udiyedi, na weku yo bwatano duhadi udiyedi se miyamiya. ³⁹ Yaubada teina tamowai maudoidi ta yodi sunuma debanawai ye kitahenamwadi, na iyamo saha ye hededehesunumadi wa sola nige se hai yodi mauli huyadiwai. ⁴⁰ Kaniyona ede ginauli namwanamwana hesau ye

** 11:35: 1 Kin 17:17-24 yo 2 Kin 4:25-37

nuwatuhekasakauli kita hesabada, na ye henuwa taba siya yo kita kabo ta haigogoi, iya ede ye tolehedudulaimamo-hoiyeida.

12

Yaubada natunao ye guguyaidi

¹ Teina bodalakilaki tamowaidi ta yodi sunuma wasadi udiyedi se hekitada idohagi bena ta miya sunuma unai. Unai kabakabihekahinida maudooidi yo ba'aya kabahekal-abesibesida ta gabaedi, na ma nuwabayaoda ta heloike-segai yoda kailakwa ta unai. ² Bena ta kitakitalau Yesu unai. Iya yoda sunuma yona kabalaoma yo yona kabagehe. Yona nuwayali unai sataulowai boita nuwamwadimwadinena ye hai, matawuwuna ye nuwatu gwauyalana kabo ye hai. Na teina huya ta Yaubada yona telona tehatutuna unai ye tutuli. ³ Yesu kwa nuwatu. Iya meta tamowai yabayababadiyao udiyedi yona hekamkamna ye haidi. Unai tabu kamnamiyao se yababa yo kwa nuwabasabasa yomi kamkamna ta udiyedi. ⁴ Huya maudoina ye laoma ee teina yomi kaipate ba'aya hewaiununa unai meta sola nige kwasinamiyao se hebwalilidi. ⁵ Nuwana Yaubada yona hededehebayao wa kwa nuwaluluhiyeidiko, doha ye kwanatuyeigomiu ye wane, “Natugu, huyana Guiyau ye guguyaigo, tabu ku nuwatuhegagili,
yo huyana ye dilaigo, tabu nuwam ye basabasa,
⁶ matawuwuna Guiyau tamowai ye gadosisiyedi ne kabo ye guguyaidi,
yo kaiteyadi ye kwanatuyedi kabo ye hekamkam-nadi.” *(Hededesonosonoga 3:11-12)*
⁷ Pilipili udiyedi bena kwa hekalakasikasinigomiu, matawuwuna teina ta meta kami guguya Yaubada unai se

laoma na yona kabikabigomiu meta doha komiu natunao mamohoidi. Tama namwanamwana meta natunao kabo ye guguyaidi. ⁸ Yaubada natunao maudoidi ye guguyaidi, na ena nige ye guguyaigomiu, meta komiu nige natunao mamohoidi, na tama hesau natunao. ⁹ Kita tamadao tanoubu ta unai se guguyaida na unai ta hekasisiyeidi. Yo gonogonowana doha Tamada galewa ne unai yona guguya taba ta haidi, kabo ta mauli.

¹⁰ Tamadao se bom yodi nuwatuwai guguya sahasahadi se kawanamwanamwaedi wa udiyedi se guguyaida huyakubwakubwa, na Yaubada ye guguyaida kita yoda namwa hesabana bena kabo yoda miyamiya maudoidi se namwa doha iya. ¹¹ Guguya nige ta henuwadi, matawuwuna udiyedi kamkamna. Na muliwai guguya ta udiyedi taumiya kabo gonowana laulaududulai yo nuwadaumwali udiyedi se miya.

¹² Unai nimamiu basabasadi yo kaemiu megwamegwadi kwa hebayaodi.

¹³ Na keda kwa ginaulihedudulaidi kaemiyao hesabadi. Unai kabo tamowai kaeyabayababadi unai se lau na taba nige se guli, na kabo namwanamwa se lobai.

Yaubada tautolodagedagelaina kadi guguya

¹⁴ Maudoimiu kwa kaipate bena nuwadaumwali unai kwa miya tamowai maudoidi maidamiyao, yo yomi mauli udiyedi bena kwa tabu. Ena nige kwa tabu, meta taba nige Guiyau kwa kita. ¹⁵ Kwa kitakitanamwanamwa to taba nige Yaubada yona kabinamwa kwa kabisapuli. Na kwa kitasipwa'uyoigomiu madai kwa hemala doha lamlam nisanisana na tamowai kwa woyasapulidi na ginauli yabayababadi se ginaulidi. ¹⁶ Kwa kitanamwanamwa tabu laulau bikibikidi** kwa ginagin-

** **12:16:** Laulau bikibikidi: Siya ede ganawali yo laulaubikibiki yo kabikabi hekadiyo doha teina.

aulidi, yo tabu kwa hemala doha Iso. Iya Yaubada ye lausuwalaei huyana yona taubaguna dudulaina maudoina ye mosegabae louguguba kesega hesabana.** ¹⁷ Kabina ta kata meta mulinawai ye henuwa bena taubaguna hedede-henamwana ye hai, na yona nuwatu wa meta tamana nige ye kawanamwanamwaei. Na Iso tamana ye kaibwadai yo ye dou, na nige gonowana saha hesau ye ginauli'uyo.**

¹⁸ Komiu nige kwa laoma kuduli mamohoina unai doha Isalaela tamowaidiyao huyana Yaubada laugagayo ye mo-seidi. Kuduli wa unai kaiwa kalakalasinna, masigili yo yaumai lakilakikalilidi. ¹⁹ Komiu nige bwagigi dagugulakilakina yo kalina lakilakina kwa lapuidi doha Isalaela tamowaidiyao. Saha se lapuidi wa ye nuwamatamatausi ede se kaibwada bena tabu Yaubada ye hedehedede'uyo kalidiwai. ²⁰ Matawuwuna ede Yaubada yona hedehedede wa unai meta se matausikalili doha ye wane, “Tabu kwa laulau kuduli ne dedekanawai, yo ena suisui hesau ye lau kuduli ne unai meta hinage kwa lauwekui.” (*Esodo 19:12-13*)

²¹ Yo Mose saha ye kita wa hinage ye matausikalili ede ye wane, “Ya matausikalili yo ya tabutabubu.” (*Dutelonomi 9:19*)

²² Na komiu kwa laoma Saiyona Kudulina unai, iya ede Yelusalema galewa ne unai wa, Yaubada Maumaulina yona magai lakilakina. Yo kwa laoma anelu bodalaki-laki nige gonowana ta hasilidi yodi gwayuala koigogona unai, ²³ yo kwa laoma Yaubada natunao taubaguna siya hesadiyao ye kulidiko galewa ne unai yodi kaihelahui koigogona unai. Yo kwa laoma Yaubada unai, iya ede tamowai maudoidi tauhekasadi, yo hinage tamowai dudulaidi yaluwadi yodi teha unai, siya ede Yaubada ye tolehedudulaimamohoiyeidiko. ²⁴ Yo kwa laoma Yesu iya talam

** 12:16: Genese 25:29-34

** 12:17: Genese 27

hauhauna tauhaiyamana unai, yo hinage kwa laoma iya kwasinana ye didi hesabada wa unai. Na iya kwasina meta namwanamwakalilina, na kabo Abela kwasinana.

²⁵ Kwa kitanamwanamwa tabu Yaubada kwa kawayagalae. Iya ede ye hededelaowa kalimiuwai. Sinai kudulina unai Yaubada ye hededelau Isalaela tamowaidiyao udiyedi, na huyadi ne unai yona hedehedede wa nige se kawakabiyei, ede ye hekamkamnakaliliyeidi. Na galewa ne unai ye hedededobima kalidawai. Na ena yona hedehedede nige ta kawakabiyei, kabo ye hekamkamnakaliliyeda na kabo Isalaela tamowaidiyao kadi hekamkamna wa.

²⁶ Huyana ye hededelau Isalaela tamowaidiyao udiyedi meta kalinana tanoubu ta ye hetabutabubu; na huya ta yona hededehe sunuma meta ye wane, “Kabo ma kesega'uyo tanoubu ta ya hetabutabubu, nige tanoubu ta ye bom na galewa kabo hinage.” (*Hagai 2:6*) ²⁷ Teina hedehedede ta “ma kesega'uyo” ye hemasalaha'uyoi meta ginauli se tabutabubu Yaubada kabo ye haigabaedi, siya ede tanoubu yo galewa ginaulidi yona hedehedede unai se tubu wa. Unai ginauli saha nige se tabutabubu kabo se miyahai.

²⁸ Basileiya ta hai ta nige gonowana ye tabutabubu, unai ede bena ta laoma Yaubada unai ma lautokida na ta kaihelahui ma hekasisida yo ma matamatausida, ²⁹ matawuwuna yoda Yaubada kana kao doha kaiwa kalakalasina yababa maudoina ye gabuhegehe.**

13

Hededehebaya gehegehena

¹ Bena kami kahao maiyamiyao kwa haigadosisi'uy-
oigomiu na kwa miya. ² Tabu kwa nuwaluluhi laolaoma

** 12:29: Dutelonomi 4:24

bena kwa yogaisinidi. Teina laulau ta unai tamowai hekadi anelu se yogaisinidi, na nige kabidi se kata meta siya anelu. ³ Numatutugudu taumiyaide yo kaiteyadi se kabihenayaidi kwa nuwatuidi doha komiu maiyamiyao kwa kamkamnagogoi.

⁴ Maudoimiu bena yomi tawasola kwa hekasisiyeidi, yo tabu kwa ganaganawali. Matawuwuna Yaubada tau-ganawali yo laulaubikibiki tamowaidi kabo ye hekamkam-nadi. ⁵ Moni tabu kwa gadosisikaliliyei, na saha kwa hai gonogonowamiu wa unai kwa miya, matawuwuna Yaubada ye hedede ye wane,

“Yau taba nige ya laugabaego
yo taba nige ya nuwagabaego.” *(Dutelonomi 31:6)*

⁶ Unai gonowada ma nuwabayaoda ta wane,

“Guiyau iya tausaguigau ede; nige gonowana ya matausi.
Tamowai meta kabo saha se ginauli kaliguwai?”
(Same 118:6,7)

⁷ Yomi tauwoyawoya bagubagunadi kwa nuwatuidi. Siya Yaubada yona hedehedede tauhedededi kalimiuwai ede. Yodi mauli kaniyodi kwa kitadiko na yodi sunuma miyamiyadi bena kwa laulauyedi. ⁸ Yesu Keliso meta kana kao kesekesegana lahi, wau teina, malaitom yo ye lau huya nige kana siga.

⁹ Na tabu lauhekata udoi'udoide se woyahesuwalagomiu. Ye namwa mo taba Yaubada yona kabinamwa unai nuwamiu ye hebayaodi. Na kaihekahekasidi udoi'udoide nige gonowana namwa hesau se haiyama. ¹⁰ Kita meta yoda kabakaitalasang milana hesau,** na siya logulogu

** **13:10:** Kabakaitalasang milana hesau kaniyona ede Yesu yona kaitalasang sataulo unai.

tabuna ** unai se tautabataba'ohu ne, siya nige yodi dudulai gonowana bena kaina se kai. **

¹¹ Dius yodi kabikabi unai taukaitalasam saesaena suisui kwasinadi ye bahelaedi teha tabukalikalilina unai bena ba'aya kaitalasamdi, na suisui yaudi se laedi magai dagelanawai se gabudi. ¹² Doha hinage Yesu magai lakilakina ganana dagelanawai ye kamkamna yo ye boita bena kwasinana unai tamowai ye tolehesuwaladi Yaubada yona. ¹³ Na kita taba ta lau kalinawai magai dagelana ne unai, to saha taumwadimwadinena ye bahei wa hinage bena ta bahei. ¹⁴ Matawuwuna teina tanoubu ta kita nige yoda magai, na yoda magai lakilakina ta nayanayai meta iya ede sola kabo ye laoma.

¹⁵ Yesu debanawai huya maudoina bena hedebasae kaitalasamna ta mosemosei Yaubada unai, na sopada ta unai Yesu hesana ta hededehemasalaha. ¹⁶ Kabinamwa yo tamowai hekadi kaikainauyaidi hinage tabu nuwamiu se luluhidi. Teina kaitalasam ta udiyedi Yaubada nuwana kwa henamwa. ¹⁷ Kami tanuwagao kwa kawakabiyeidi yo yodi lolina gigibwalidi udiyedi kwa miya. Se kitahetetegomiu na saha se ginaulidi wa meta bena kabo se tolehemasalahadi Yaubada unai. Kwa kawakabiyeidi, kabo yodi paisowa unai nuwadi se namwa. Tabu nuwadiyao kwa heyababadi. Ena nuwadiyao kwa heyababadi meta taba nige se sagunamwanamwaegomiu.

¹⁸ Yomai kwa tapwalolo. Kabina ka kata meta nige kama gilu, yo yoma gadosisi ede bena ginauli maudoidi udiyedi dudulai mo unai ka miya. ¹⁹ Ya kaibwadaigomiu bena yogu kwa tapwalolo to kabo ya lagemwamwayaowa kalimiuwai.

** **13:10:** Logulogu tabuna meta Numa Tabuna heyaheyasonina, iya ede Yelusalema unai. ** **13:10:** Nige yodi dudulai gonowana bena kaina se kai kaniyona ede Yesu yona kaitalasam sataulo unai nige namwana se lobai.

²⁰ Nuwatalu Yaubadana yoda Guiyau Yesu boita unai ye hetolo'uyoi. Kita iya yona mamoe na iya taukita-heteteda saesaena, yo iya kwasinana unai Yaubada talam miyamiyahaina ye hemamohoiyei. ²¹ Na ka kaibwada Nuwatalu Yaubadana unai taba ginauli namwanamwadi maudoidi ye lediwa na udiyedi kabo yona nuwatu kwa ginauliwatanidi. Yo ginauli saha Yaubada nuwana se henamwa meta taba kalidawai ye ginaulidi Yesu Keliso debanawai. Lautoki yo hedebasae ta mosei Yesu Keliso unai ye lau huya nige kana siga. Amen.

²² Kagu kahao, ya kaibwadaigomiu bena kwa lapulapuinamwanamwa yogu hededehebayao ta unai, matawuwuna teina leta ta nige ye loha.

²³ Ya henuwa bena kabina kwa kata meta kada kaha Timoti numatutugudu unai se hepesayako. Ena ye lagemwamwayauma inai kabo maiyagu ka laowa ka kitagomiu.

²⁴ Yogu lautoki ye laowa yomi tauwoyawoya udiyedi yo hinage taukawamamohoi maudoimiu kalimiuwai. Yo ekalesiya Italiya unai se laoma wa hinage yodi lautoki se hetamaliyawa kalimiuwai.

²⁵ Yaubada yona kabinamwa ye laowa maudoimiu kalimiuwai.

Yaubada wasana: Buka Hauhauna tupwana
The Message about God: The New Testament in the Saliba
language of Papua New Guinea
Nupela Testamen long tokples Saliba long Niugini

copyright © 2007, 2013, 2017, 2021 Wycliffe Bible Translators, Inc.

© Wycliffe Bible Translators, Inc.

Language: Saliba

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-07-19

PDF generated using Haiola and XeLaTeX on 19 Oct 2021 from source files dated 14 Jul 2021

a38b418f-b400-5c73-b231-ea8af9b0924a